

Der Ungeseffenen Eydt.

Ich N. Schwere / der Römischen / auch zu Hungern
vnd Behem 2c. Rū. May. meinem Allergenedigisten
Herrn / vnd an stat Ihrer May. derselbigen Haupt-
man oder Verwalter / so ieder zeit von Ihrer May. in
Sandt Joachimsthal verordent werden / das ich
Ihrer May. derselben Hauptman / Verwalter / Bur-
germeister / Richter vnd Radt / so lang ich meinen enthalt alhie
hab / getrew vnd gehorsam sein wil / Ihre gebot trewlich halten /
allen schaden warnen / vnd nach meinem höchsten vermügen hel-
ffen verkuhmen / auch sonsten alles andere handeln / das einem fru-
men gehorsamen zustehet / Getrewlich vnd vngesehrlich / Als mir
Gott helfff 2c.



Krentzler Eydt.:

Ich N. Schwere / der Römischen / auch zu Hungern
vnd Behem 2c. Rū. May. meinem Allergenedigisten
Herrn / Vnd an stat Ihrer May. derselbigen Haupt-
man oder Verwalter / so ieder zeit von Ihrer May. inn
Sant Joachimsthal verordent werden / Nachdem ich
zu eynem Krentzler bin angenommen / das ich denselben
dinst / nach meinem höchsten vermügen vnd vorstant / getrewlich
vnd vleissig fürstehen wil / iderman rechten warhafften bericht
thuen / was an iedem ort / der gemaine Kauff ist / Keinen vorteyl /
noch betrug suchen noch gebrauchen / sondern mich gegen Armen
vnd Reichen gleichmessig / vñ vnuorweisslich halten / Welcher mir
auch Auckes zuuerkauffen anpeut / oder zu kauffen begert / dene wil
ich damit am ersten fürdern / Vnd in berurtem meinem dinst / weder
gunst / geschenck / freundschaft noch feindschaft / noch ichtes
anders / wie zuerdencken ansehen / sondern mich an dem / was mir
ein ieder aus gutem freyen willen / zutrancelt schencket oder gibt /
gentslich begnügen lassen / Vnd alles andere handeln vnd thuen /
was eynem aufrichten Krentzler gebürt vnd zustehet / Getrewlich
vnd vngesehrlich / Als mir Gott helfff 2c.

Volget das Register